

Karić pristao na godinu zatvora

Sud Bosne i Hercegovine (BiH) razmatrao je sporazum o priznanju krivice koji je optuženi Karić sklopio sa Tužilaštvom BiH u maju 2017. godine. Sutkinja Biljana Ćuković je kazala da Sudsko vijeće danas nije moglo odlučiti da li prihvata sporazum pa će odluku saopštiti naredne sedmice.

Tužilaštvo i odbrana sporazumom su dogovorili da Karić bude osuđen na godinu zatvora. Tužilac Dubravko Ćampara je rekao da je Karić saradivao s Tužilaštvom i dao značajne informacije. Optuženi je, prema tužiočevim riječima, opisao kako je davao novac direktoru Uprave za indirektno oporezivanje (UIO) BiH.

Počelo suđenje Kemalu Ćauševiću

Karić je optužen da je bivšem direktoru UIO BiH [Kemalu Ćauševiću](#) dao 425.000 KM kako bi njegove dvije firme imale povlašten tretman prilikom uvoza tekstila u BiH.

Prema optužnici, Ćaušević je početkom 2007. godine stupio u kontakt s Karićem i Sadikovićem, vlasnicima firmi koje su uvozile tekstil iz Turske, Kine i Mađarske u BiH. Ćaušević je s njima dogovorio da će obezbijediti da im se prilikom uvoza robe na carini priznaju fakture na kojima su prikazane manje cijene robe od stvarnih cijena, kao i da im se roba neće detaljno pregledavati.

Ćaušević je od Sadikovića i Karića zahtijevao da mu daju 1.000 KM po uvezenom kamionu, na šta su oni pristali. Tako su mu od 2007. do februara 2011. godine za uvoz 1.722 kamiona tekstila dali najmanje 1.722.000 KM.

Ukoliko Sud prihvati sporazum Karić bi trebao svjedočiti na suđenju protiv Ćauševića i Sadikovića. Tužilac Ćampara je rekao da je Karić ključni svjedok Tužilaštva.

„Smatramo da će njegova izjava biti ključna u dokazivanju onoga što su počinili prvooptuženi i Sadiković“, rekao je Čampara.

Sutkinja Ćuković pitala je tužioca da pojasni visinu kazne koju su dogovorili sporazumom, a s obzirom da je Karić ranije bio osuđen na pet godina zatvora zbog porezne utaje i da je prema sadašnjoj optužnici; Čauševiću dao skoro pola miliona KM dara.

Tužilac Čampara je odgovorio da je Karić raniju kaznu odslužio i da njegove firme nemaju nikakvih dugovanja prema UI0BiH.

Suđenje Čauševiću, Sadikoviću i Kariću počelo je 6. jula 2017. godine. Nakon što je Tužilaštvo obavijestilo Sud da je sklopilo sporazum s Karićem, njegov predmet je razdvojen kako bi Sudsko vijeće odlučilo da li će prihvatiti sporazum.

Čaušević je optužen i za kupovinu nekretnina i zemljišta u Sarajevu i okolini u iznosu od oko 1,2 miliona KM između 2004. i 2012. godine, novcem za koji je znao da potječe radnjama krivičnih djela, o čemu je CIN ranije pisao. Tužilaštvo smatra i da je zloupotrijebio položaj kada je omogućio da se preduzeću “Glas Srpski” – Grafika AD Banja Luka uplati 200.000 KM zbog navodne štete, nastale u postupku javnih nabavki za usluge štampanja kontrolnih markica za potrebe UI0-a.